

27-04-2023

Kommuunit oqaloqateqatigalugit inuit napparsimanermik pissuteqartumik suliffissarsiortut ikiorsiissutinik qinnuteqartut qanoq pitsaanerpaamik aalajangiinissap tungaanut aningaasartuutiminnik akissaqarnissaannut sullinneqarnissaannik qulakkeerinninnissamut Naalakkersuisut peqquneqarnissaannik Inatsisartut aalajangiiffisissaattut siunnersuut.

(Inatsisartunut ilaasortaq, Doris J. Jensen, Siumut)

Akissuteqaat

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerneqarnera

Naalakkersuisut sinnerlugit Doris Jensen, Siumut, aalajangiiffisassatut siunnersuut pillugu qujassutigissavara.

Naalakkersuisut piffissaq iluatsillugu qujassuteqarlutik eqqumaffigeqquvaat suliffissarsiortunut ikiorsiissutit pillugit inatsit nutaaq atuutilertussaasoq.

Inatsimmi arlalitsigut qulakkeerneqarpoq innuttaasut napparsimallutik nalunaartut, napparsimaneq pissutigalugu akissarsiaqarnissamut pinsinnaatitaanngitsut, pitsaanerusumik atugassaqalernissaat. Siullermik aningaasaqarnikkut tapersersuineq piffissaq qaammatinut arfinilinnut sivitsorneqarpoq, qaammatinik pingasunik sivitsueqqissinnaanermik periarfissalerlugu sivitsueqqinnermi tamakkiisumik napparsimajunnaarneq ilimagineqartillugu. Aappassaannik nalunaaquttap akunnerinut appasinnerpaaffittut killigititaq maannakkut nalunaaquttap akunneri 14-iniit 22-nut qaffanneqarpoq.

Suliffissarsiortunut ikiorsiissutit pillugit inatsimmi piunasaqaateqarpoq, napparsimasoq erngerluni napparsimanini kommunimut (Majoriamut) nalunaarutigissagaa, suliffissarsiortunut ikiorsiissutit ullut 14-ikkaartumik nalinginnaasumik ullut 14-ikkaarlugit akissarsisitsineq peqatigalugu tunniunneqartartussanngorlugit.

Innuttaasoq sulisoq aamma sulisinnaajunnaartoq napparsimasutullu nalunaartariaqartoq, piaarnerpaamik napparsimalluni nalunaaruteqassaaq. Paasissutissat pisariaqartut tigueqarpata, kommunip suliffissarsiortunut ikiorsiissutit pillugit qinnuteqaat erngerluni suliarissavaa – napparsimaneq, suliffeqannginneq imalunniit angerlartitsineq pineqarnersoq apeqqutaatinnagu.

Inuk sulisoq aamma napparsimaneq pissutigalugu suliffissarsiortunut ikiorsiissutinik pisariaqartitsisoq pillugu naatsorsuutigineqarpoq, napparsimalerneq sioqqullugu nalinginnaasumik akissarsiaqartinneqartoq. Inuk suliffeqanngitsoq, suliffissarsiortunut ikiorsiissutinik pisartagaqareersoq aamma napparsimalersoq, suliffissarsiortunut ikiorsiissutinik suli pisartagaqassaaq.

Naalakkersuisut ersarissumik naatsorsuutigaat, inuk kinaluunniit napparsimaneq suliffeqannginnerluunniit pissutigalugu kingusinaartumik pisartakkanik tunineqassasoq.

Naalakkersuisut 2022-mi ukiakkut pikkorissaaneq annertoq ingerlappaat, illoqarfinni tamani suliffissarsiortunut ikiorsiissutit pillugit inatsit nutaaq pillugu sukumiisumik

ilinniartinneqarlutik. 2023-mi marsimi illoqarfinni tamani peqataaffigineqartumik pikkorissarnerit qarasaasiakkut malitseqartinneqarput.

Suliffissarsiortunut ikiorsiissutit pillugit inatsisip atuutilerpat, IT aqqissuussaq nutaaq atuutlernissaanut piariissaaq. IT aqqissuussaq nutaaq kommunimi sulianik suliaqarnermik oqilisaassinissaq siunertaralugu sananeqarpoq, ikiorsiissutinik naatsorsuisarneq tunniussisarnerlu eqqarsaatigalugit.

Qulaani allaqqasut tunngavigalugit Naalackersuisut naatsorsuutigaat, kommunit suliffeqanngitsunut napparsimallutillu nalunaartunut ikiorsiissutinik suli naatsorsuisinnaallutillu tunniussisinnaassasut, paasisssutissat pisariaqartut pissarsiarineqariarpata.

Siunnersuutip ajunngitsortai takusinnaagaluarlugit Naalackersuisut siunnersuutip tunuartinneqarnissaa inassutiginiarpaat qulaani allaqqasut tunngavigalugit.